

2015 Rhif 1494 (Cy. 166)

GOFAL CYMDEITHASOL,
CYMRU

Rheoliadau Gofal a Chymorth
(Anghydfodau ynghylch Preswylfa
Arferol, etc.) (Cymru) 2015

NODYN ESBONIADOL

(Nid yw'r nodyn hwn yn rhan o'r Rheoliadau)

Mae adran 195 o Ddeddf Gwasanaethau Cymdeithasol a Llesiant (Cymru) 2014 ("Deddf 2014") yn darparu ar gyfer dyfarnu ar anghydfodau rhwng awdurdodau lleol ynghylch ble y mae person yn preswyllo fel arfer yng Nghymru at ddibenion Deddf 2014 ac ar gyfer dyfarnu ar anghydfodau rhwng awdurdod anfon ac awdurdod derbyn o dan adran 56 o Ddeddf 2014 (hygludedd gofal a chymorth) ynghylch cymhwysu'r adran honno mewn perthynas â pherson.

Mae'r Rheoliadau hyn yn gwneud darpariaeth bellach ynghylch datrys anghydfodau o'r fath ac yn nodi'r gweithdrefnau sydd i'w dilyn pan fydd anghydfodau'n codi.

Bydd y Rheoliadau hyn yn gymwys hefyd i anghydfod rhwng awdurdodau lleol yng Nghymru ynghylch ble yr oedd person yn preswyllo fel arfer at ddibenion adran 117(3) o Ddeddf Iechyd Meddwl 1983 (ôl-ofal). Mae adran 117(4) o'r Ddeddf honno yn darparu bod adran 195 o Ddeddf 2014 yn gymwys i anghydfod o'r fath fel y mae'n gymwys i anghydfod ynghylch ble'r oedd person yn preswyllo fel arfer at ddibenion Deddf 2014.

Mae rheoliad 2 yn nodi pa awdurdod lleol sy'n gyfrifol am ddiwallu anghenion unigolyn hyd nes y caiff yr anghydfod ei ddatrys.

Mae rheoliad 3 yn darparu ar gyfer y camau sydd i'w cymryd gan awdurdodau lleol i geisio datrys yr anghydfod cyn ei atgyfeirio i Weinidogion Cymru ddyfarnu arno o dan adran 195 o'r Ddeddf.

Mae rheoliad 4 yn nodi'r ddogfennaeth sydd i'w darparu gan awdurdodau lleol wrth wneud atgyfeiriad.

Mae rheoliadau 5 a 6 yn nodi fersiynau o'r darpariaethau hyn sydd wedi eu haddasu ychydig ar gyfer achosion penodol sy'n codi o dan adran 189 o'r Ddeddf.

Mae rheoliad 7 yn darparu ar gyfer adolygu dyfarniadau. Mae rheoliad 8 yn darparu ar gyfer ad-dalu rhwng awdurdodau lleol os effaith dyfarniad diwygiedig yn dilyn adolygiad yw nad oedd symiau a dalwyd o dan ddyfarniad blaenorol yn ddyledus.

2015 Rhif 1494 (Cy. 166)

**GOFAL CYMDEITHASOL,
CYMRU**

Rheoliadau Gofal a Chymorth
(Anghydfodau ynghylch Preswylfa
Arferol, etc.) (Cymru) 2015

Gwnaed 7 Gorffennaf 2015

*Gosodwyd gerbron Cynulliad Cenedlaethol
Cymru* 10 Gorffennaf 2015

Yn dod i rym 6 Ebrill 2016

Mae Gweinidogion Cymru, drwy arfer y pwerau a roddwyd gan adran 195(2) o Ddeddf Gwasanaethau Cymdeithasol a Llesiant (Cymru) 2014(1), yn gwneud y Rheoliadau a ganlyn:

Enwi, cychwyn, cymhwyso a dehongli

1.—(1) Enw'r Rheoliadau hyn yw Rheoliadau Gofal a Chymorth (Anghydfodau ynghylch Preswylfa Arferol, etc.) (Cymru) 2015.

(2) Daw'r Rheoliadau hyn i rym ar 6 Ebrill 2016 ac maent yn gymwys o ran Cymru.

(3) Yn y Rheoliadau hyn—

ystyr “anghydfod” (“*dispute*”) yw anghydfod—

- (a) rhwng awdurdodau lleol ynghylch ble y mae person yn preswyllo fel arfer yng Nghymru at ddibenion y Ddeddf,
- (b) rhwng awdurdod lleol anfon ac awdurdod lleol derbyn o dan adran 56 o'r Ddeddf (hygludedd gofal a chymorth) ynghylch cymhwyso'r adran honno, neu
- (c) rhwng awdurdodau lleol ynghylch cymhwyso adran 189 o'r Ddeddf (methiant darparwr: dyletswydd dros dro ar awdurdod lleol);

ystyr “yr awdurdod arweiniol” (“*the lead authority*”), mewn perthynas ag anghydfod, yw'r

awdurdod lleol sydd (o ganlyniad i reoliad 2 neu fel arall)—

- (a) yn diwallu anghenion y person y mae'r anghydfod yn ymwneud ag ef, neu ofalwr dros y person hwnnw, ar y dyddiad y mae'r anghydfod yn codi, neu
- (b) os nad oes unrhyw awdurdod lleol yn diwallu'r anghenion hynny ar y dyddiad hwnnw, o dan ofyniad i wneud hynny gan reoliad 2(3);

ystyr "atgyfeirir" ac "yn cael ei atgyfeirio" ("referred") yw atgyfeirio i gael dyfarniad arno gan y person priodol, ac mae "atgyfeirio" ("refer") ac "atgyfeiriad" ("referral") i'w dehongli yn unol â hynny;

ystyr "y Ddeddf" ("the Act") yw Deddf Gwasanaethau Cymdeithasol a Llesiant (Cymru) 2014;

ystyr "y person priodol" ("the appropriate person") yw'r person y mae anghydfod i'w ddyfarnu arno ganddo yn unol ag adran 195(1) o'r Ddeddf.

(4) Mae cyfeiriadau yn y Rheoliadau hyn at y dyddiad y mae anghydfod yn codi yn gyfeiriadau at y dyddiad cyntaf yr anfonir cyfathrebiad ysgrifenedig arno gan un o'r awdurdodau lleol ("yr awdurdod cyntaf") at un arall o'r awdurdodau lleol ("yr ail awdurdod") sydd (yn ôl y digwydd)—

- (a) yn honni nad yw'r person y mae'r anghydfod yn ymwneud ag ef, ym marn yr awdurdod cyntaf, yn preswyllo fel arfer yn ei ardal at ddibenion y Ddeddf, neu fod y person yn preswyllo fel arfer yn ardal yr ail awdurdod at y dibenion hynny,
- (b) yn codi mater ynghylch cymhwyso adran 56 o'r Ddeddf, neu
- (c) yn codi mater ynghylch cymhwyso adran 189 o'r Ddeddf.

(5) Yn y Rheoliadau hyn, mae cyfeiriad at "yr awdurdodau" yn gyfeiriad at yr awdurdodau sy'n bartïon i anghydfod ac mae'n cynnwys (pan fo'n wahanol) gyfeiriad at yr awdurdod arweiniol mewn perthynas â'r anghydfod hwnnw.

Cyfrifoldeb am ddiwallu anghenion tra bo anghydfod heb ei ddatrys

2.—(1) Ni chaiff yr awdurdodau ganiatáu i fodolaeth yr anghydfod atal diwallu, oedi cyn diwallu, ymyrryd â diwallu, neu effeithio'n andwyol fel arall ar ddiwallu, anghenion y person y mae'r anghydfod yn ymwneud ag ef neu anghenion gofalwr y person hwnnw.

(2) Rhaid i'r awdurdod lleol sy'n diwallu anghenion y person neu'r gofalwr ar y dyddiad y mae'r anghydfod yn codi barhau i ddiwallu'r anghenion hynny hyd nes y caiff yr anghydfod ei ddatrys.

(3) Os nad oes unrhyw awdurdod lleol yn diwallu'r anghenion ar y dyddiad y mae'r anghydfod yn codi—

- (a) rhaid i'r awdurdod lleol y mae'r person y mae'r anghydfod yn ymwneud ag ef yn byw yn ei ardal, neu
- (b) os nad yw'r person y mae'r anghydfod yn ymwneud ag ef yn byw yn ardal unrhyw awdurdod lleol, rhaid i'r awdurdod lleol y mae'r person hwnnw'n bresennol yn ei ardal

gyflawni, hyd nes y caiff yr anghydfod ei ddatrys, y dyletswyddau o dan y Ddeddf mewn cysylltiad â'r person ac unrhyw ofalwr y person hwnnw fel petai'r person yn preswyllo fel arfer yn ei ardal.

(4) Os yw'r ddyletswydd o dan baragraff (3) i'w chyflawni gan awdurdod lleol ("A") nad yw'n un o'r awdurdodau sydd eisoes yn barti i'r anghydfod, rhaid i'r awdurdodau hynny, yn ddi-oed, dynnu sylw A at—

- (a) dyletswydd A o dan y paragraff hwnnw, a
- (b) statws A fel yr awdurdod arweiniol at ddibenion y Rheoliadau hyn.

(5) Nid yw A o dan y dyletswyddau yn y Rheoliadau hyn tan y dyddiad y daw'n ymwybodol, neu y gellid yn rhesymol ddisgwyl iddo fod wedi bod yn ymwybodol, o'i statws fel yr awdurdod arweiniol.

(6) Pan fo'r anghydfod yn ymwneud â chymhwyso adran 56 (hygludedd gofal a chymorth), rhaid i'r awdurdodau gyflawni'r dyletswyddau o dan yr adran honno er gwaethaf bodolaeth yr anghydfod.

Y camau sydd i'w cymryd cyn atgyfeirio anghydfod

3.—(1) Rhaid i'r awdurdodau, cyn atgyfeirio'r anghydfod, gymryd y camau a bennir yn y rheoliad hwn.

(2) Cyn gynted ag y bo'n rhesymol ymarferol ar ôl y dyddiad y mae'r anghydfod yn codi—

- (a) rhaid i'r awdurdod arweiniol geisio canfod yr holl awdurdodau eraill sydd â rhan yn yr anghydfod a chydgyssylltu trafodaethau rhwng yr awdurdodau hynny mewn ymgais i ddatrys yr anghydfod, a
- (b) rhaid i bob un o'r awdurdodau enwebu unigolyn a fydd yn gweithredu fel y pwynt cyswllt o fewn yr awdurdod hwnnw mewn perthynas â'r anghydfod, a rhoi manylion cyswllt yr unigolyn hwnnw i'r awdurdodau eraill.

(3) Rhaid i'r awdurdod arweiniol—

- (a) cydgysylltu'r modd y mae'r awdurdodau yn cyflawni eu dyletswyddau o dan y rheoliad hwn,
- (b) cymryd camau i sicrhau oddi wrth yr awdurdodau eraill wybodaeth a allai fod yn berthnasol i'r dyfarniad ar yr anghydfod,
- (c) datgelu'r wybodaeth honno i unrhyw awdurdod arall, a
- (d) datgelu i'r awdurdodau eraill unrhyw wybodaeth y mae'r awdurdod arweiniol ei hun yn ei dal ac a allai helpu i ddatrys yr anghydfod.

(4) Rhaid i'r awdurdodau—

- (a) cymryd pob cam rhesymol i ddatrys yr anghydfod rhyngddynt hwy eu hunain, a
- (b) cydweithredu â'i gilydd wrth gyflawni eu dyletswyddau o dan y rheoliad hwn.

(5) Rhaid i bob un o'r awdurdodau—

- (a) cynnal deialog adeiladol gyda'r awdurdodau eraill, gyda golwg ar beri i'r anghydfod gael ei ddatrys yn gyflym,
- (b) cydymffurfio, yn ddi-oed, ag unrhyw gais rhesymol am wybodaeth berthnasol a wneir gan yr awdurdod arweiniol, ac
- (c) hysbysu'r awdurdodau eraill yn rheolaidd am unrhyw ddatblygiadau y mae'n ymddangos iddo eu bod yn berthnasol i'r dyfarniad ar yr anghydfod.

(6) Rhaid i'r awdurdod arweiniol ddarparu i'r personau y mae paragraff (7) yn gymwys iddynt unrhyw wybodaeth y mae'n ymddangos iddo ei bod yn briodol am gynnydd i ddatrys yr anghydfod.

(7) Mae'r paragraff hwn yn gymwys i'r personau canlynol—

- (a) y person y mae'r anghydfod yn ymwneud ag ef,
- (b) gofalwr y person hwnnw (os yw'r anghydfod yn ymwneud â pha awdurdod sydd i ddiwallu anghenion gofalwr), ac
- (c) person sy'n cynrychioli'r person neu'r gofalwr.

(8) Os nad yw'r awdurdodau yn gallu datrys yr anghydfod rhyngddynt hwy eu hunain o fewn pedwar mis i'r dyddiad y cododd yr anghydfod, rhaid i'r awdurdod arweiniol ei atgyfeirio at y person priodol.

Atgyfeirio: anghydfodau ynghylch preswylfa arferol neu hygludedd gofal a chymorth

4.—(1) Rhaid i'r atgyfeiriad gynnwys y dogfennau canlynol—

- (a) llythyr a lofnodwyd gan yr awdurdod arweiniol mewn perthynas â'r anghydfod,
 - (b) datganiad o'r ffeithiau a lofnodwyd ar ran pob un o'r awdurdodau sy'n cynnwys yr wybodaeth a bennir ym mharagraff (2), ac
 - (c) copiâu o'r holl ohebiaeth rhwng yr awdurdodau sy'n ymwneud â'r anghydfod.
- (2) Yr wybodaeth benodedig yw—
- (a) esboniad o natur yr anghydfod,
 - (b) cronoleg y digwyddiadau a arweiniodd at atgyfeirio'r anghydfod, gan gynnwys y dyddiad y cododd yr anghydfod,
 - (c) y manylion am anghenion y person y mae'r anghydfod yn ymwneud ag ef ("y person perthnasol") o ddechrau'r cyfnod y mae'r anghydfod yn ymwneud ag ef,
 - (d) os yw'r anghydfod yn ymwneud â pha awdurdod sydd i ddiwallu anghenion gofalwr, y manylion am anghenion y gofalwr o ddechrau'r cyfnod y mae'r anghydfod yn ymwneud ag ef,
 - (e) datganiad ynghylch pa awdurdod sydd wedi diwallu'r anghenion hynny ers dechrau'r cyfnod y mae'r anghydfod yn ymwneud ag ef, sut y cafodd yr anghenion hynny eu diwallu a'r darpariaethau statudol y cawsant eu diwallu odanynt,
 - (f) y manylion am fan preswyllo'r person perthnasol, ac am unrhyw fannau preswyllo blaenorol sy'n berthnasol i'r anghydfod,
 - (g) mewn achos pan fo galluedd y person perthnasol i benderfynu ble i fyw yn berthnasol i'r anghydfod, naill ai—
 - (i) datganiad bod yr awdurdodau'n cytuno bod gan, neu nad oes gan, y person alluedd o'r fath, neu
 - (ii) gwybodaeth y mae'n ymddangos i unrhyw un neu ragor o'r awdurdodau ei bod yn berthnasol i'r cwestiwn ynghylch a oes gan, neu a nad oes gan, y person alluedd o'r fath,
 - (h) datganiad ynghylch unrhyw gamau eraill a gymerwyd gan yr awdurdodau mewn perthynas â'r person perthnasol neu ei ofalwr, ac a all fod yn berthnasol i'r anghydfod,
 - (i) y manylion am y camau y mae'r awdurdodau wedi eu cymryd i ddatrys yr anghydfod rhyngddynt hwy eu hunain, a
 - (j) unrhyw wybodaeth arall y mae'n ymddangos i unrhyw un neu ragor o'r awdurdodau ei bod yn berthnasol i'r dyfarniad ar yr anghydfod.

(3) Rhaid i'r awdurdodau gyflwyno unrhyw ddadleuon cyfreithiol y maent yn dibynnu arnynt mewn perthynas â'r anghydfod o fewn 14 o ddiwrnodau i'r dyddiad yr atgyfeirir yr anghydfod.

(4) Os yw awdurdod yn cyflwyno dadleuon cyfreithiol, rhaid iddo—

- (a) anfon copi o'r dadleuon hynny at yr awdurdodau eraill, a
- (b) darparu tystiolaeth i'r person priodol ei fod wedi gwneud hynny.

(5) Os yw'r person priodol yn gofyn i unrhyw un neu ragor o'r awdurdodau ddarparu gwybodaeth bellach, rhaid i'r awdurdod lleol y gwneir cais hwn iddo gydymffurfo ag ef yn ddi-oed.

(6) Nid yw'r rheoliad hwn yn gymwys i achos y mae rheoliad 5 neu 6 yn gymwys iddo.

Atgyfeirio: anghydfodau ynghylch cydweithredu o dan adran 189 (methiant darparwr: dyletswydd dros dro ar awdurdod lleol)

5.—(1) Mae'r rheoliad hwn yn gymwys i anghydfod sy'n ymwneud yn unig â chymhwyso adran 189(7)(a) neu (b) o'r Ddeddf (dyletswydd i gydweithredu).

(2) Rhaid i'r atgyfeiriad gynnwys y dogfennau canlynol—

- (a) llythyr a lofnodwyd gan yr awdurdod arweiniol mewn perthynas â'r anghydfod, yn datgan bod yr anghydfod yn cael ei atgyfeirio,
- (b) datganiad o'r ffeithiau a lofnodwyd ar ran pob un o'r awdurdodau sy'n cynnwys yr wybodaeth a bennir ym mharagraff (3), ac
- (c) copïau o'r holl ohebiaeth rhwng yr awdurdodau sy'n ymwneud â'r anghydfod.

(3) Yr wybodaeth benodedig yw—

- (a) esboniad o natur yr anghydfod,
- (b) cronoleg y digwyddiadau a arweiniodd at atgyfeirio'r anghydfod, gan gynnwys y dyddiad y cododd yr anghydfod,
- (c) y manylion am y camau y mae'r awdurdodau wedi eu cymryd i ddatrys yr anghydfod rhyngddynt hwy eu hunain, a
- (d) unrhyw wybodaeth arall y mae'n ymddangos i unrhyw un neu ragor o'r awdurdodau ei bod yn berthnasol i'r dyfarniad ar yr anghydfod.

(4) Rhaid i'r awdurdodau gyflwyno unrhyw ddadleuon cyfreithiol y maent yn dibynnu arnynt mewn perthynas â'r anghydfod o fewn 14 o ddiwrnodau i'r dyddiad yr atgyfeirir yr anghydfod.

(5) Os yw awdurdod yn cyflwyno dadleuon cyfreithiol, rhaid iddo—

- (a) anfon copi o'r dadleuon hynny at yr awdurdodau eraill, a
- (b) darparu tystiolaeth i'r person priodol ei fod wedi gwneud hynny.

(6) Os yw'r person priodol yn gofyn i unrhyw un neu ragor o'r awdurdodau ddarparu gwybodaeth bellach, rhaid i'r awdurdod lleol y gwneir y cais hwn iddo gydymffurfo ag ef yn ddi-oed.

Atgyfeirio: anghydfodau ynghylch costau a dynnwyd o dan adran 189 (methiant darparwr: dyletswydd dros dro ar awdurdod lleol)

6.—(1) Mae'r rheoliad hwn yn gymwys i anghydfod sy'n ymwneud yn unig â chymhwyso adran 189(7)(c) o'r Ddeddf (adennill costau).

(2) Rhaid i'r atgyfeiriad gynnwys y dogfennau canlynol—

- (a) llythyr a lofnodwyd gan yr awdurdod arweiniol mewn perthynas â'r anghydfod, yn datgan bod yr anghydfod yn cael ei atgyfeirio,
- (b) datganiad o'r ffeithiau a lofnodwyd ar ran pob un o'r awdurdodau sy'n cynnwys yr wybodaeth a bennir ym mharagraff (3), ac
- (c) copïau o'r holl ohebiaeth rhwng yr awdurdodau sy'n ymwneud â'r anghydfod.

(3) Yr wybodaeth benodedig yw—

- (a) esboniad o natur yr anghydfod,
- (b) cronoleg y digwyddiadau a arweiniodd at atgyfeirio'r anghydfod, gan gynnwys y dyddiad y cododd yr anghydfod,
- (c) y manylion am anghenion y person y mae'r anghydfod yn ymwneud ag ef ("y person perthnasol") o ddechrau'r cyfnod y mae'r anghydfod yn ymwneud ag ef,
- (d) os yw'r anghydfod yn ymwneud â pha awdurdod sydd i ddiwallu anghenion gofalwr, y manylion am anghenion y gofalwr o ddechrau'r cyfnod y mae'r anghydfod yn ymwneud ag ef,
- (e) datganiad ynghylch pa awdurdod sydd wedi diwallu'r anghenion hynny ers dechrau'r cyfnod y mae'r anghydfod yn ymwneud ag ef, sut y cafodd yr anghenion hynny eu diwallu a'r darpariaethau statudol y cawsant eu diwallu odanynt,
- (f) gwybodaeth am y costau y ceisir eu hadennill, gan gynnwys dadansoddiad o'r costau hynny,
- (g) y manylion am y camau y mae'r awdurdodau wedi eu cymryd i ddatrys yr anghydfod rhyngddynt hwy eu hunain, ac

- (h) unrhyw wybodaeth arall y mae'n ymddangos i unrhyw un neu ragor o'r awdurdodau ei bod yn berthnasol i'r dyfarniad ar yr anghydfod.

(4) Rhaid i'r awdurdodau gyflwyno unrhyw ddadleuon cyfreithiol y maent yn dibynnu arnynt mewn perthynas â'r anghydfod o fewn 14 o ddiwrnodau i'r dyddiad yr atgyfeirir yr anghydfod.

(5) Os yw awdurdod yn cyflwyno dadleuon cyfreithiol, rhaid iddo—

- (a) anfon copi o'r dadleuon hynny at yr awdurdodau eraill, a
- (b) darparu tystiolaeth i'r person priodol ei fod wedi gwneud hynny.

(6) Os yw'r person priodol yn gofyn i unrhyw un neu ragor o'r awdurdodau ddarparu gwybodaeth bellach, rhaid i'r awdurdod lleol y gwneir y cais hwn iddo gydymffurfo ag ef yn ddi-oed.

Adolygu dyfarniadau

7.—(1) Caiff awdurdod wneud cais i Weinidogion Cymru am adolygu'r dyfarniad.

(2) Rhaid i unrhyw gais o'r fath gael ei wneud o fewn tri mis i ddyddiad y dyfarniad.

(3) Caniateir i adolygiad gael ei gynnal gan Weinidogion Cymru (p'un ai mewn ymateb i gais neu fel arall).

(4) Caiff Gweinidogion Cymru gadarnhau'r dyfarniad neu roi dyfarniad gwahanol yn ei le.

Dyfarniadau a amnewidiwyd

8.—(1) Pan fo—

- (a) adolygiad o ddyfarniad wedi ei gynnal yn unol â rheoliad 7 a bod dyfarniad gwahanol wedi ei roi yn ei le,
- (b) awdurdod lleol ("A"), o ganlyniad i'r dyfarniad cyntaf, wedi talu swm i awdurdod lleol arall ("B"), ac
- (c) effaith yr ail ddyfarniad yn golygu nad oedd yn ofynnol i rywfaint neu'r cyfan o'r swm a dalwyd gan A i B gael ei dalu,

rhaid i B ad-dalu i A y swm nad oedd yn ofynnol iddo gael ei dalu.

Mark Drakeford

Y Gweinidog Iechyd a Gwasanaethau Cymdeithasol,
un o Weinidogion Cymru
7 Gorffennaf 2015